

**Qinersisarnermut inatsisip atuuttup ingammik qinersiviup ataasiinnaalersimanageranut tunngatillugu inuit tamat oqartussaaqataanerannut tunngatillugu naleqquttuunersoq Naalakkersuisut misissueqqissaaqqullugit peqquneqarnissaat siunertaralugu Inatsisartut aalajangiiffigisassaattut siunnersuut.**

(Inatsisartunut ilaasortaq Naaja Nathanielsen, Inuit Ataqatigiit)

### **Akissuteqaat**

(Nunamut Namminermt, Pinngortitamut Avatangiisinullu Naalakkersuisoq)

Aallaqqaasiullugu Naalakkersuisut aalajangiiffigisassatut siunnersuuteqartoqarnera qujassutigissavaat.

Inatsisartunut Ilaasortaq Naaja Nathanielsen siunnersuuteqarpoq Naalakkersuisut 2012 naatinnagu inuit tamat oqartussaaqataanerannut maannakkut qinerseriaatsip pingaaruteqassusia pillugu nassuiaammik suliaqaqquneqassasut, pingaartumik qinersiviup ataasiinnaap ingerlatiinnarneqarneratigut iluaqutaasinnaasut ajoqutaasinnaasullu qulaajarneqarnissaat siunertaralugu.

Inatsisartunut qinersisarneq pillugu maannakkut aaqjissuussineq Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersukkut, Kalaallit Nunaanni Inatsisartunut qinersisarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. 10, 30. oktober 1998-imeersukkut allanngortinneqartukkut, malittarisassaqaartitaavoq. 1998-imi qinersivinnut agguarsimaneq allanngortinneqarpoq qinersivik ataasiinnanngortillugu, siusinnerusukkut qinersiviit arfineq pingasuugaluartut. Allanngortitsinermt tunngavilersuutigineqarpoq taamaaliornikkut Inatsisartut sulineranni nuna tamakkerlugu naalakkersuinermt tunngasut pingaartinneqarnerussasut kiisalu tamatuma kingunerissagaa nunap immikkoortuini immikkut soqutigisat assigiinngitsut Inatsisartunut ilaasortanit tamarmiusunit akisussaaffigineqalernissaat isiginiarneqarnerusariaqartoq.

Qinersivinnut agguarsimanagerup oqallisigineqartarnera nutaarsiassaanngilaq. UPA 2005/123-mi Inuit Ataqatigiit siunnersuuteqarput nunarput inatsisartunut qinersivinnut arlalinnut agguarneqaqqissasoq Inatsisartut aalajangiiffigisagaat. Inatsisartut aaqjissuussaanermt ataatsimiititaliap suliaminik naammassinnereernissaanut kommunillu nutaamik ilusilerneqarnissaasa aalajangiiffigineqareernissaanut apeqqutip oqallisigineqarnissaa kinguartinneqassasoq aalajangiipput, tassami inuit tamat oqartussaaqataanermt pillugu pissutsit aammattaaq kommunalbestyrelsinut qinersisarnermt tunngatillugu oqaluserineqartussaasimmata. 2008-mi kommunalbestyrelsinut qinersinerni kommunit sisamat tamarmik immikkut qinersivinngorput, kommuniusimasullu tamarmik immikkut kommunalbestyrelsinu ilaasortaqarnissaat qulakkeerneqarluni, nunami sumiinneq apeqqutaatillugu ilaasortaataasunik imaluunniit nunap sumiiffiini sinniisuutitatu taaneqarsinnaasunik ilaasortaataqarnikkut.

UKA 2007/147-mi Kattusseqatigiit Partiiat siunnersuuteqarpoq Naalakkersuisut peqquneqassasut Inatsisartunut qinersisarneq pillugu inatsit allanngorteqqullugu Qaanaamiit Ittoqqortoormiiniillu ilaasortaqartalernissaa qulakkeerniarlugu. Taamaattoq siunnersuut Inatsisartunit amerlanerussuteqartunit taperserneqanngilaq.

Siunnersuuteqartup tunngavilersuuteqarnermini allassimasaatut ilumoorpoq Kalaallit Nunaanni Namminersorneq pillugu Isumalioqatigiissitaq april 2003-mi isumaliutissiissummini isumaqarmat qinersivinnut agguarsimanerup atuutiqinnissaa eqqarsaatersuutigineqartariaqartoq, isumaqarnarmammi nunap immikkoortui assigiinngitsut periarfissaqassappata inatsisartuni sinniisoqartariaqartut aammalumi nunatsinni isorliunerusut inukittuinnaanertik pissutigalugu Inatsisartunut ilaasortaataqarnissartik ajornartorsiutigisarmassuk. Qinersivinnut agguarsimanerup eqqarsaatersuutigeqqissaarneqarnissaanut Naalakkersuisut isumaqataapput.

Naalakkersuisut siunnersuuteqartoq isumaqatigaat pingaaruteqarnerarmagu innuttaasut tamarmik inuiaqatigiit ineriartortitaanerannut sunniuteqarsinnaanerminnik misigisaqarsinnaanissaat, pingaartumik ukiuni makkunani kommunit anginerulersimaneranni aamma inuiaqatigiinnik iluarsaaqqinnerit annertuut aallarterminalerfianni. Tamakku tunngavigalugit Naalakkersuisut isumaqarput naliliisarluni misissuisoqartarnissaa pissusissamisoortoq. Naalakkersuisut aamma isumaqatigaat qinerseriaatsip maannamut atuuttup tamat oqartussaaqataanerat pillugu siunertamisut ingerlanersoq misissorluarneqarnissaa nalilersorneqarnissaalu tulluurtuusoq.

Taamaammat Naalakkersuisut pissusissamisoortippaat qinersisarnermut inatsisip atuuttup ingammik qinersiviup ataasiinnaalersimaneranut tunngatillugu inuit tamat oqartussaaqataanerannut tunngatillugu naleqquttuuneranik Naalakkersuisut misissueqqissaaqqullugit peqquneqarnissaat siunertaralugu Inatsisartut aalajangiiffigisassaattut siunnersuutip tapersersorneqarnissaa.

Naalakkersuisut qulequttap pingaarutillip matuma siunnerfilimmik iluaqutaasumillu Inatsisartunit oqaluuserineqarnissaa qilanaaraat.